

## **Sing vooraf staande:** Skrifberyming 5-3:1, 2 (8:1, 2)

- 1 Aan U, o Lam van God, 'n nuwe lofgesang! / Want U is waardig om die wonderboek te ontvang en oop te breek – die boek van toekoms en verlede / en van wat word, geskryf van Gods verborgenhede. U's waardig, U alleen, omdat die werk volbrag is, / toe U as offer vir ons sondeskuld geslag is.
- 2 U 't van die hemel hoog op aarde neer wou daal, / en ons vir God gekoop uit alle volk en taal. Die losprys was u bloed, wat U vir ons gestort het, / waardeur ons, rein gewas, 'n priestervolk geword het en konings in die ryk van onverstoorb're vrede, / om God te dien en eer in eindlose ewighede.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

**Amen.**

## Psalm 107:1, 2 (p. 533)

- 1 Loof God, omdat Hy goed is, / en goed is sonder end!  
Meld dit, al wie behoed is, / verlos is uit ellend;  
wat God uit elke land / in vryheid weer herstel het,  
vry van die slaweband, / waarmee hul hom geknel het.
- 2 In woesteny verlore, / was daar vir hul geen pad  
wat hul langs regte spore / kon heenlei na 'n stad.  
Gebrek aan drank en brood / sou hulle laat versmag het  
as God nie in hul nood / op hul geroep geag het.

## Gebed

### Skrifberyming 12-2:2, 3 (27:2, 3)

- 2 Hy wat deur die Gees ontvang is / – die geheimenis is groot! –  
en gebore is uit Maria, / uit die maagdelike skoot.  
Wat gelyk het toe Pilatus / onregsvonnis het gevel –  
kruis en doodsmart ondergaan het, / al die angste van die hel.
- 3 Wat die derde dag verrys het, / daar die dood Hom nie kon hou;  
na die hemel opgevaar het / deur die diep, onpeilb're blou.  
Wat nou sit, met eer en sterkte / aan Gods regterhand omgeef,  
tot Hy weerkom as die regter / van wat dood is en wat leef.

**Skriflesing:** Filippense 2:5-11; Nederlandse Geloofsbelydenis, Artikel 18

**Kernvers:** Filippense 2:6-8

**Hy wat in die gestalte van God was, het sy bestaan op Godgelyke wyse nie beskou as iets waaraan Hy Hom moes vasklem nie, maar Hy het Homself verneder deur die gestalte van 'n slaaf aan te neem en aan mense gelyk te word.**

**En toe Hy as mens verskyn het, het Hy Homself verder verneder. Hy was gehoorsaam tot in die dood, ja, die dood aan die kruis.**

(Filippense 2:6-8 AFR83)

## Nederlandse Geloofsbelydenis

### **Artikel 18 – Die menswording van Jesus Christus**

*Ons bely dat God die belofte aan die vaders deur die mond van die heilige profete inderdaad vervul het deur sy eie eniggebore en ewige Seun in die wêreld te stuur op die tyd deur Hom bepaal. Hy het die gestalte van 'n dienskneg aangeneem en aan die mens gelyk geword (Fil 2:7) deur werklik 'n egte menslike natuur, met al sy swakhede maar sonder sonde, aan te neem. Hy is in die liggaam van die geseënde maagd Maria deur die krag van die Heilige Gees en sonder die toedoen van 'n man*

*verwek. Hy het nie alleen wat die liggaam betref die menslike natuur aangeneem nie, maar ook 'n egte menslike siel, om so 'n werklike mens te wees.*

*Want Hy moes sowel die siel as die liggaam aanneem om al twee te red, aangesien beide verlore was. Teenoor die kettery van die Wederdopers, wat ontken dat Christus die menslike vlees uit sy moeder aangeneem het, bely ons daarom dat Christus die vlees en bloed van die kinders deelagtig geword het (Heb 2:14), dat Hy wat die vlees betref, 'n nakomeling van Dawid is, as mens gebore is uit die geslag van Dawid (Hand 2:30 en Rom 1:3), 'n vrug van die moederskoot van Maria (Luk 1:42), gebore uit 'n vrou (Gal 4:4, 'n spruit van Dawid (Jer 33:15), 'n loot uit die wortels van Isai (Jes 11:1), van die geslag van Juda afstam (Heb 7:14), uit die Jode as mens gebore (Rom 9:5), uit die geslag van Abraham, aangesien Hy die geslag van Abraham aangeneem het en in alle opsigte – maar sonder sonde – aan sy broers gelyk geword het (Heb 2:17 en Heb 4:15). Ons bely inderdaad dat Hy waarlik Emmanuel is, dit wil sê: God met ons (Matt 1:23).*

*Fil 2:7; 1 Tim 3:16; Luk 1:55; Gen 26:4; 2 Sam 7:12; Ps 132:11; Hand 13:23; 1 Tim 2:5; 1 Kor 12:3; Deut 29:2; Ps 119:34; Rom 7:19; Jer 33:15; Heb 7:14; Rom 9:5; Gal 3:16; Heb 2:16; Matt 1:16.*

### **Tema:** Ter wille van ons het die Seun van God mens geword

Geliefdes in ons Here Jesus Christus, wanneer die Here ons God die mens herskep, maak Hy dit duidelik dat die mens uit homself nie in staat is om homself te herskep en 'n nuwe lewe te lei nie. Reeds by die sondeval belowe God dat die vrou se nageslag die slang se kop sal vermorsel. Maar Eva is onmagtig om so 'n nageslag uit haarself voort te bring. Al Eva se kinders deur die eeue heen het nie die slang se kop vermorsel nie, maar juis sy heerskappy bevestig.

God belowe aan Abraham dat al die nasies in hom geseënd sal wees, maar Sara is onvrugbaar tot in haar negentigste jaar. Isak en Rebekka het vyftien jaar gewag voordat daar 'n nageslag vir hulle gebore is. En hulle nageslagte het nie een die slang se kop vermorsel nie, maar juis sy heerskappy oor hulle bevestig. Voorwaar, die mens kan uit homself nie sy nuwe lewe bewerkstellig nie, want geeneen kan 'n nageslag voortbring wat in staat is om die slang se kop te vermorsel nie.

Wanneer 'n mens die mensdom van die begin af so in oënskou neem, is dit te verstane dat Job in 'n stadium moedeloos kon sê:

**As daar maar iemand was wat in die saak tussen ons kon oordeel, wat oor ons albei onpartydig kon regsprek, as daar maar iemand was wat God se straf van my kon wegneem, sodat sy verskrikking my nie skielik oorval nie, dan sou ek sonder vrees kon praat. Maar soos sake nou met my staan, kan ek nie.**  
(Job 9:33-35 AFR83)

Die belofte dat die nageslag van Eva die slang se kop sal vermorsel, soos dit duidelik geword het deur die eeue van die menslike lewe, het nie en kon nie bewaarheid word deur die normale geboortes nie. Trouens, wat uit die mens kom, is mens. Die nageslag is net so ellendig en vol sonde soos die voorgeslag. God se belofte van so 'n nageslag uit Eva se kinders sal op 'n ander manier waar moet word.

Geliefdes, as God 'n belofte maak, kan ons maar verseker weet dat Hy dit waar sal maak. Hy bly getrou aan sy woord. Ja, vir Hom is niks onmoontlik nie, want Hy is die almagtige God, Vader, Seun en Heilige Gees. Nog voor die skepping het God geweet dat die herskepping van die mens nie deur die mens self bewerk sal kan word nie. Hy wat God is, sal dit doen, want as die mens eers in die sonde geval het, is hy tot in sy diepste wese bederf, sodat niks goeds uit hom sal kan voortkom nie. Daarom het die ewige Seun van God reeds voor die skepping teenoor die Vader en die Heilige Gees Homself bereid verklaar om die herskeppingswerk te kom doen. Vir Hom, om die herskeppingswerk te doen, was dit egter nodig om 'n mens te word. Die Seun van God wat self ewige en ware God is

en bly, het mens geword. Vir ons is dit 'n ondeurgrondelike geheimenis. Die mens kan met sy verstand eenvoudig nie verstaan hoe dit moontlik is dat die Verlosser terselfdertyd Seun van God – dit is ware God – en afstammeling van Dawid – dit is ware mens – kan wees nie. Daarom sê Paulus op 'n plek:

**En, onteenseglik, die verborgenheid van die godsaligheid is groot: God is geopenbaar in die vlees.** (1 Timoteus 3:16 AFR53)

As ons ewige en barmhartige God hierdie geheimenis nie self aan ons geopenbaar het nie, sou ons dit nooit geglo het nie.

Nou het God hierdie geheimenis juis aan ons geopenbaar sodat ons kan glo dat sy ewige Seun, wat ware God is en bly, 'n ware mens geword het. En hierdie openbaring is nie vir intelligente mense gegee nie, maar vir elkeen van God se kinders sodat hulle daardeur getroos kan word in lewe en in sterwe. Daarom gaan ons aan die hand van Artikel 18 by twee sake stilstaan, naamlik die menswording van Christus en die betekenis daarvan.

Die hoofsaak wat ons hier bely, is dit: Die ewige Seun van God het die ware menslike natuur aangeneem. Die woord *aangeneem* is van deurslaggewende belang om aan die menswording van Christus te glo. Wat ons hier bely, kom uit Paulus se brief aan die Filippense:

**Hy wat in die gestalte van God was, het sy bestaan op Godgelyke wyse nie beskou as iets waaraan Hy Hom moes vasklem nie, maar Hy het Homself verneder deur die gestalte van 'n slaaf aan te neem en aan mense gelyk te word.** (Filippense 2:6-7 AFR83)

Die Seun van God is van ewigheid af God. Hy is in die gestalte van God, want Hyself is God saam met sy Vader en die Heilige Gees. Hy is egter nie net van ewigheid af God nie – Hy is ook tot in ewigheid God. Die Seun kan en sal nooit ophou om God te wees nie. Daarom het die Seun ook nie nodig om aan sy Godheid vas te klem asof dit van Hom af weggeneem kan word nie. As die Goddelike natuur van die Seun af weggeneem kon word, sou Hy nie self God kan wees nie. Maar in sy wese is die Seun God. Daarom bely ons: Hy is ware God en bly ook ware God (Sondag 14:35). Hy hou nooit op om God te wees nie.

Ek weet dat hierdie dinge vir ons moeilik kan wees om te begryp, maar kom ons probeer dit met 'n beeld duideliker maak. Iemand, kom ons noem hom Jan, is 'n man met 'n hoë IK en hy het die eienskappe om 'n groot firma te bestuur, wat hy ook doen. Maar toe gebeur daar iets onverklaarbaar eendag en hy word 'n boemelaar. Hierdie boemelaar se naam is nog steeds Jan en hy het nog steeds 'n hoë IK en het die eienskappe om 'n groot firma te bestuur, maar hy wil dit nie meer doen nie. In sy wese is Jan, die boemelaar, steeds dieselfde mens as Jan, die bestuurder van 'n firma.

Toe die Seun van God mens geword het, het Hy nie opgehou om God te wees nie, want Hy is in sy wese waarlik God en Hy bly God tot in alle ewigheid. Daarom het Hy nie nodig om aan sy Goddelike natuur vas te klem asof Hy dit kan verloor of dit van Hom af weggevat kan word nie.

Maar van ewigheid af was Hy bereid om Homself te verneder. En op die bestemde tyd het Hy dit ook gedoen.

**Hy het Homself verneder deur die gestalte van 'n slaaf aan te neem en aan mense gelyk te word.** (Filippense 2:7 AFR83)

Aangesien Hy van ewigheid tot ewigheid God is en bly, het Hy net die gestalte van 'n slaaf aangeneem. Hy het die ware menslike natuur by sy Goddelike natuur geneem, sodat Hy Seun van God – dit is ware God – en tegelykertyd afstammeling van Dawid – dit is ware mens – kan wees.

Hierdie menswording van die Seun van God het wel beteken dat Hy die heerlikheid wat Hy by die

Vader in die hemel gehad het tydelik nie geopenbaar het nie en die eerlose kleed van mens wees aangeneem het. Deur die werking van die Heilige Gees het die maagd Maria swanger geword. En van daardie heel eerste oomblik van bevrugting af, was die Seun van God binne-in Maria en besig om die ware menslike natuur uit haar aan te neem. Dit het Hy gedoen om na die volle tyd van swangerskap uit Maria gebore te word as Jesus – 'n klein babatjie wat neergelê moes word, wat moes tande kry, leer loop en leer praat soos alle mense. Hy, die Seun van God, het regtig uit Maria die egte menslike natuur aangeneem.

Alleen as ons daaraan vashou dat Jesus Christus ware God is en dit ook in sy mens-wording gebly het, kan ons verstaan dat Hy ook self meegewerk het aan sy menswording. Dat Hyself besluit het om mens te word en Homself te verneder, getuig van sy oneindige liefde vir ons. Terwyl ons gebore is sonder ons keuse of toedoen, was sy geboorte 'n welbewuste keuse, 'n daad van onmeetlike liefde vir mense. Christus was dus ter wille van ons besig met die herskeppingswerk – nie net aan die einde van sy lewe op aarde nie, maar reeds heel aan die begin daarvan, ja, selfs voor sy geboorte as mens. Sy lê in die krip was dus net so 'n groot liefdesdaad as sy hang aan die kruis. Betlehem en Golgota is albei altare waarop Hy Homself vir ons aan God geoffer het.

Broers, susters en kinders, dat die ewige Seun van God mens geword het, is nie maar net iets wat ons moet weet sodat ons diegene wat kerkisasie-onderrig gee tevrede kan stel om uiteindelik belydenis van geloof te doen nie. Die Seun van God se selfopoffering om mens te word, getuig van sy liefde vir ons. Hy het geweet toe Hy ons menslike natuur aan-geneem het dat dit 'n brose en sterflike natuur is. Hy het ook geweet dat Hy aan liggaam en siel bitter sal moet ly vir sy kinders. Tog was Hy bereid om dit te doen uit liefde vir ons en vir sy Vader. As Hy nie daarvoor kans sou sien om te ly nie, was ons almal verlore.

Verder is dit belangrik om daarop te let dat Hy ons menslike natuur nie half-half aangeneem het nie. Nee, Hy het aan mense gelyk geword in alles behalwe die sonde. Geen deel van 'n mens se lewe was vir Hom vreemd nie en Hy het Homself ook nie van enige deel van die menslike lewe uitgesluit nie. Daar is reeds opgemerk dat Hy as klein babatjie ook moes tande kry, Hy moes leer praat en leer loop. Hy het ook geweet wat is honger, dors, pyn en eensaamheid. Hy het dit alles self beleef. Daarom kan Hy vir ons 'n volkome Verlosser wees. Hy kan ons wat versoek word, help., want Hy is self versoek en het gely. Hy weet wat dit is om 'n swakke mens te wees. Daarom het Hy medelye met ons swakhede. Hy was immers in elke opsig net soos ons aan versoekings onderwerp, maar Hy het nie gesondig nie. Hy is 'n egte mens, maar ook 'n regverdige mens – mens wat geen sonde het nie – sodat Hy ons van ons sondes kan verlos en die skuld by God kan betaal. 'n Mens wat sonde het, wat self skuld het, kan nie vir 'n ander sondaar betaal nie. Iemand wat bankrot is, kan nie 'n ander een uit bankrotskap red nie. Jesus Christus is die enigste egte Mens wat sonder sondeskuld is en tegelykertyd ware God wat vir ons die skuld ten volle kan betaal.

Dit is nou alles goed en wel as ons weet dat die ewige Seun van God die ware menslike natuur uit die vlees en bloed van Maria aangeneem het om as ons Verlosser gebore te word. Maar wat beteken die heilige ontvangenis en geboorte van Christus vir ons? Op hierdie vraag antwoord ons kort en kragtig: Dit beteken dat Hy ons Middelaar is.

Tog, geliefdes, as ons maar net vir ander mense sou sê dat Christus se heilige ontvangenis en geboorte vir ons beteken dat Hy ons Middelaar is, gaan hulle nog nie mooi verstaan nie. Daarom sê ons verder nog duideliker wat Christus se menswording vir ons beteken. Met sy onskuld en volkome heiligheid bedek Hy my sonde waarin ek ontvang en gebore is voor God.

Ons sonde het nie eers begin die dag toe ons begin praat of self dinge kon doen nie. Sonde oorval 'n mens nie skielik op 'n dag nadat jy gebore is nie. Ons word met 'n sondige geaardheid gebore. Dawid skryf:

**Ek was al skuldig toe ek gebore is, met sonde belaaï toe my moeder swanger geword het.**

(Psalm 51:7 AFR83)

Daarom bely ons dat ons in sonde ontvang en gebore is. Van die oomblik dat bevrugting plaasgevind het, is die sondige geaardheid in daardie mensie teenwoordig wat nog aan die groei is. En ons behou hierdie sondige geaardheid tot die dag dat ons sterf.

Daarom was dit vir die Seun van God nodig om as die klein babatjie Jesus gebore te word sodat Hy ons volkome Verlosser kan wees. Hy moes ons nie net van die sonde wat ons van drie jaar oud of die sonde wat ons eers as volwasse mense gedoen het, kom verlos het nie. Hy moes ons ook verlos van die sonde waarin ons ontvang en gebore is.

En juis dít doen Jesus Christus deur sy heilige ontvangenis en geboorte. Sy onskuld en volkome heiligheid wat strek van sy ontvangenis en geboorte af tot by sy dood, skenk God die Vader deur sy Gees aan ons. Van die oomblik toe Maria swanger word het, was die Mens Jesus Christus sonder sonde en volkome heilig. En so het Hy as onskuldige en volkome heilige Mens sy lewe lank geleef tot in die dood. Nou spreid ons Here Jesus Christus deur die werking van die Heilige Gees sy onskuldige en volkome heilige lewe oor ons uit, sodat ons hele lewe van die oomblik toe ons moeders met ons swanger geword het tot die dag dat ons sterf, voor God bedek sal wees.

Die Heilige Gees bind ons deur die geloof so in Christus Jesus in dat ons voor God die Vader kan verskyn asof ons nooit enige sonde gedoen of gehad het nie. Jesus Christus bedek ons hele lewe so volkome met sy hele lewe dat God van al ons sondes en ons sondige geaardheid vergeet en nooit meer daaraan wil dink nie.

Geliefdes, die ewige Seun van God het sy onmeetlike liefde aan ons betoon toe Hy Homself verneder het om ook ons swakke menslike natuur aan te neem sodat Hy vTer wille van ons het die Seun van God mens gewordir ons 'n volkome Verlosser kan wees. Hy het in alles aan ons gelyk geword – behalwe die sonde – sodat Hy vir ons 'n Middelaar kan wees. Het jy Hom vir hierdie herskeppingswerk lief? Getuig jou hele lewe daarvan dat jy Hom liefhet? Loof en dank jy die Vader dat die Heilige Gees jou hele lewe met sy Seun se volkome heilige lewe bedek?

**Amen!**

Slotgebed

Formulier vir die bevestiging van ouderlinge en diakens

Psalm 134:4 (p. 653)

- 4 Laat, HEER, u seën op hul daal, / u guns uit Sion hul bestraal!  
U wat beveel en – dit geskied, / wil, HEER, u sien oor hul gebied!

Skrifberyming 17-2:1, 2, 3, 4 (18:1, 2, 3, 4) (op die melodie van Psalm 134)

- 1 Ek loof U, Vader, groot van mag, / dat U die dinge, diep en swaar,  
vir wêreldwyse onbekend, / aan kindertjies wou openbaar.
- 2 Ja, Vader, dis u guns alleen, / die guns van al wat dwang is, vry,  
waardeur ook alle dinge saam / al oorgelewer is aan My.
- 3 Wie kan die Seun ooit ken, as net / die Vader, met Hom wesens-een?  
of wie die eewge Vader ken, / as net die Seun, net Hy alleen?
- 4 Wie kan die eewge Wese ken, / so diep en ontoeganklik klaar?...  
Alleen die mens aan wie die Seun, / die heilgeheim wil openbaar.

Die genade van ons Here Jesus Christus, die liefde God die Vader en die gemeenskap van die Heilige Gees sal met elkeen van julle wees en bly.

**Amen.**

Ds Coenraad Vrey  
Gereformeerde Kerk Bellville  
16 Desember 2012